

LIGJ
Nr.9951, datë 10.7.2008

**PËR DISA NDRYSHIME DHE SHTESA NË LIGJIN NR.9270, DATË 29.7.2004 “PËR
SISTEMIN E ADRESAVE”**

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr.9270, datë 29.7.2004 “Për sistemin e adresave”, bëhen këto ndryshime dhe shtesa:

Neni 1

Neni 1 ndryshohet si më poshtë:

“Neni 1

Ky ligj ka për qëllim të përcaktojë mënyrën e krijimit dhe të administrimit të sistemit të adresave, për identifikimin e çdo ndërtese dhe trualli të lirë, brenda së njëjtës njësi të qeverisjes vendore, në territorin e Republikës së Shqipërisë.”.

Neni 2

Pas nenit 1 shtohet neni 1/1 me këtë përmbajtje:

“Neni 1/1

Në kuptim të këtij ligji:

1. “Adresa” përbëhet nga fjalë, numra dhe shenja ortografike, të renditura sipas një rregulli të caktuar, të cilat tregojnë vendndodhjen e saktë të një ndërtese ose të një trualli të lirë. Ajo formohet nga shkronja të alfabetit shqip dhe shifra arabe.

2. “Bulevard”, “rrugë”, “rrugicë”, “shesh”, “park” janë pjesë të territorit publik, që shërbejnë si referencë për përshkrimin e vendndodhjes së saktë të një ndërtese dhe të një trualli të lirë, brenda së njëjtës njësi të qeverisjes vendore, në territorin e Republikës së Shqipërisë.

3. “Regjistri vendor i adresave” është një dokument shtetëror, ku hidhen, ruhen dhe pasqyrohen, në mënyrë të vazhdueshme, elementet përbërëse të adresës.

4. “Regjistri Kombëtar i Adresave” është dokumenti unik shtetëror, që krijohet nga tërësia e të dhënave të regjistrave vendorë të adresave.”.

Neni 3

Neni 2 ndryshohet si më poshtë:

“Neni 2

1. Elementet e adresës janë: emri i rrethit, në përbërje të të cilit ndodhet bashkia ose komuna ku ndodhet ndërtesa; emri i bashkisë ose i komunës; emri i qytetit ose i fshatit; emri i bulevardit, rrugës, rrugicës, sheshit ose parkut ku ka dalje ndërtesa; numri i ndërtesës, numri i hyrjes, numri i apartamentit; kodi postar, i miratuar nga Këshilli i Ministrave.

2. Ministri i Brendshëm, me urdhër, përcakton modelin e adresës dhe radhën e vendosjes së elementeve të adresës në të.”.

Neni 4

Neni 3 ndryshohet si më poshtë:

“Neni 3

Emërtimi i bulevardeve, rrugëve, rrugicave, shesheve dhe parqeve bëhet me vendim të këshillit bashkiak ose komunal, nën juridiksionin e të cilave ato ndodhen, ndërsa numërtimi i ndërtesave, hyrjeve dhe apartamenteve bëhet nga seksionet dhe zyrat e urbanistikës në bashki ose komunë, nën juridiksionin e të cilave ato ndodhen.”.

Neni 5

Pas nenit 4 shtohet neni 4/1 me këtë përmbajtje:

“Neni 4/1

1. Çdo njësi e qeverisjes vendore krijon, përditëson dhe administron të dhënat në regjistrin vendor të adresave.

2. Drejtoria e Përgjithshme e Gjendjes Civile krijon dhe administron Regjistrin Kombëtar të Adresave.

3. Mënyra e krijimit, administrimit të regjistrave vendorë dhe Regjistrin Kombëtar të Adresave, si dhe rregullat e shfrytëzimit të sistemit e të rrjetit informatik përcaktohen me vendim të Këshillit të Ministrave, brenda tre muajve nga hyrja në fuqi e këtij ligji.”.

Neni 6

Në nenin 14, pika 1 ndryshohet si më poshtë:

“1. Në qoftë se një ndërtesë ka dy ose më shumë hyrje, që dalin në një bulevard, rrugë, rrugicë, shesh ose park, të cilat përdoren për hyrje dhe dalje, secilës hyrje i vihet një numër.”.

Neni 7

Në nenin 21, pika 3 ndryshohet si më poshtë:

“3. Ngarkohet Ministri i Brendshëm të nxjerrë aktet nënligjore për të përcaktuar rregulla të hollësishme për emërtimin dhe numërtimin e ndërtesave dhe të rrugëve, sipas pikave 1 dhe 2 të këtij neni.”.

Neni 8

Neni 25 ndryshohet si më poshtë:

“Neni 25

Tabelat për emërtimin e bulevardeve, të rrugëve, rrugicave, shesheve, parqeve dhe numërtimin e ndërtesave, të hyrjeve dhe apartamenteve janë standarde brenda territorit të Republikës së Shqipërisë.”.

Neni 9

Ky ligj hyn në fuqi 15 ditë pas botimit në Fletoren Zyrtare.

**Shpallur me dekretin nr.5829, datë 29.7.2008 të Presidentit të Republikës së Shqipërisë,
Bamir Topi**